

# ANALIZA PROJEKTET 2015

## Festa e Birrës 2015

[www.festaebirres.com](http://www.festaebirres.com)

[www.korcabeerfest.com](http://www.korcabeerfest.com)

### Përshkrim shkurtimisht:

Projekti “Festa e Birrës”, i implementuar për të nëntin vit radhazi synoi stimulimin, mbështetjen, promovimin e bizneseve lokale, dhe stimulimin e turizmit si drejtim i rëndësishëm zhvillimi për qytetin. Këtë vit, ndryshe nga vitet e kaluara festa u pozicionua në krah të Stadiumit “Skënderbeu” dhe përgjatë 5 netëve 12-16 gusht 2015, pati një sërë aktivitete të zhvilluara , ku performuan këngëtarë të njohur dhe grupe të shquara brenda Shqipërisë dhe jashtë saj.

Gjatë pesë netëve të festës, u vu re një audience masive, jo vetëm nga qyteti i Korçës dhe rrethinat e tij, por edhe turistët vendas dhe të huaj, të ardhur posaçërisht për të ndjekur këtë event të rëndësishëm.

Realizimi i kësaj feste bëhet i mundur nga kontributi i bizneseve pjesëmarrëse dhe mbështetese, të cilat kanë mundësi veç të tjerash të reklamojnë aktivitetin e tyre para një audience të madhe njerëzish, që kap shifrat rreth 10 mijë vetë çdo natë si edhe të jenë në vëmendjen e mediave lokale dhe kombëtare që ndjekin çdo natë ecurinë e aktivitetit.

Ky event përveç se përfaqëson një nga eksperiencat më pozitive dhe më të suksesshme të zhvillimit të turizmit, promovon gjithashtu qytetin dhe ato çka ai përfaqëson si një destinacion të rëndësishëm turistik në Shqipëri.

Vlera totale e këtij projekti nga Bashkia: **1 000 000 Lek**

Vlera e realizuar e projektit: **946 800 Lek**



*Foto nga Festa e Birrës 2015*

## Festa e Lakrorit

### Përshkrim shkurtimisht:

Projekti “Festa e Lakrorit 2015” u implementua edhe këtë vit në formën e një eventi që tërhoqi vëmendjen dhe pjesëmarrjen e shumë vizitorëve, duke konsoliduar profilin festiv të kësaj tradite. Festa e Lakrorit këtë vit ndryshe nga vitet e kaluara, u zhvillua në Boboshticë në datën 31 Korrik 2015, me qëllim gjallërimin e jetës turstike si edhe ruajtjen e traditës së gatimit tradicional edhe në atraksionet turistike që i bashkangjiten qytetit të Korçës në kuadrin e ndarjes së re administrative territoriale. Për realizimin e këtj projekti me të gjithë komponentët e nevojshëm, fituesi i tenderit siguroi gjithë infrastrukturën e nevojshme për realizimin e aktivitetit, duke zbatuar me përpikmëri të gjitha specifikimet e tenderit. Pjesëmarrës në këtë aktivitetet ishin 4 taverna, që ushtrojnë aktivitetin e tyre në Boboshticë: Rosicat, Vila Melko, Taverna Antoneta dhe taverna Tomas, të cilat tregëtuan jo vetëm lakror, por edhe gatime të tjera tradicionale. Gjithashtu në festë mori pjesë edhe pastičeri Nefeli, e cila tregëtoi për të pranishmit ëmbëlsira dhe akullore. Gjatë festës amvisat demonstruan bërjen e lakrorit si edhe pjekjen në sac duke plotësuar kërkesat e pjesëmarrësve në festë. Gjatë gjithë aktivitetit, nuk munguan edhe tingujt e serenatave korçare, duke gjallëruar akoma më shumë atmosferën festive. Pjesëmarrësit në këtë festë ishin të shumtë, rreth 1000 persona, nga të cilët shumica ishin qytetarë të Korçës që kihin erdhur në Boboshticë enkas për festë. Nuk mungonin edhe vizitorë vendas dhe të huaj. Impakti që kjo festë pati në Boboshticë ishte pozitiv, pasi të gjitha tavernat në Boboshticë ishin të frekuentuara maksimalisht. Gjatë festës, u shpërndanë edhe materiale promociionale të qytetit.

Vlera totale e këtij projekti e planifikuar nga Bashkia: **145 000 Lek**

Vlera e realizuar e projektit: **144 240 Lek**



*Foto nga aktiviteti festa e lakrorit*

## Respekt për mësuesit

### Përshkrim shkurtimisht:

Me rastin e 7-Marsit, festës së mësuesve, Bashkia Korçë zhvilloi në ambientet e muzeut kombëtar të arsimit “Mësonjëtorja e Parë Shqipe” një pritje koktej me mësues korçarë, të cilët kanë dhënë një kontribut të jashtëzakonshëm në edukimin e brezave. Mësuesve pensionistë, të cilët ishin të pranishëm në aktivitet, iu dhuruan lule në shenjë mirënjohjeje.

Në pritjen e nderit, Kryetari i Bashkisë përcolli urimet dhe falenderimet për kontributin e jashtëzakonshëm të mësuesve korçarë në vite, të cilët punuan gjithë jetën në këtë profesion kaq të dashur duke edukuar me profesionalizëm, përkushtim dhe fisnikëri disa gjenerata.

Vlera totale e këtij projekti e planifikuar nga Bashkia: **100 000 Lek.**

Vlera e realizuar e projektit: **90 600 Lek**



## Bursa për gjimnazistët

### Përshkrim shkurtimisht:

Bashkia e Korçës vazhdon të zbatojë çdo vit projektin “Bursa për gjimnazistët”, i cili synon stimulimin e nxënësve dhe nxitjen e tyre për të arritur rezultate të shkëlqyera. Duke qënë një program social-arsimor, përfitues janë nxënësit me të gjitha notat 10 për vitet e njëmbëdhjeta, të dymbëdhjeta në të gjitha shkollat e mesme publike dhe jopublike të qytetit të Korçës.

Projekti “Bursa për gjimnazistët” ka si synim jo vetëm vlerësimin moral, por edhe material të gjimnazistëve me të gjitha notat dhjeta, në formën e një burse mujore, e cila shërben si një formë e re nxitjeje për nxënësit me qëllim arritjen e rezultateve me të larta, duke e kthyer arsimimin në një prioritet të tyre.

Drejtoria Rajonale e Arsimit bashkëpunoi me të gjithë shkollat e mesme në qytet për dhënien e emrave të nxënësve të shkëlqyer të vitit akademik 2014-2015, të cilët janë përfitues direktë të projektit.

Bashkia Korçë në datën 24 Nëntor 2015, ora 18:00 në ambientet e Muzeut Kombëtar të Arsimit “Mësonjëtorja e Parë Shqipe”, Korçë u organizua ceremonia e shpërndarjes së certifikatave për nxënësit



me të gjitha notat dhjeta nga pesë gjimnazet publike dhe jopublike të qytetit. Nxënësit e shkëlqyer u vlerësuan nga kryetari i Bashkisë me çertifikata dhe për të gjithë të pranishmit në fund të aktivitetit u shërbye një koktej.

Vlera totale e këtij projekti e planifikuar nga Bashkia: **1 121 000 Lek.**

Vlera e realizuar e projektit: Projekti perfundon ne muajin Qershor 2016



*Foto nga Ceremonia e shpërndarjes së çertifikatave për gjimnazistët e shkëlqyer*

## **Kalendari i Aktiviteteve 2015**


### **Përshkrim shkurtimisht:**

Bashkia Korçë, me qëllim promovimin e aktiviteteve social-kulturore e turistike të qytetit, promovimin e muzeumeve dhe atraksioneve turistike të rajonit si edhe për të pasur një paketë informuese për vizitorët vendas dhe të huaj që vizitojnë qytetin, realizoi Kalendarin e Aktiviteteve 2015, i cili përmbledh paketën e plotë të eventeve të rajonit të Korçës.

Pas konfirmimit të datave të sakta të aktiviteteve, u konceptua draft kalendari, i cili përfshinte përshkrimet e aktiviteteve, datat përkatëse si edhe foto të aktiviteteve. Pas konfirmimit të draftit final për këtë projekt, u realizua printimi i kalendarit nga kompania fituese e tenderit.

Vlera totale e këtij projekti e planifikuar nga Bashkia: **70 000 Lek.**

Vlera e realizuar e projektit: **46 800 Lek**



## **Pjesëmarrje në Panairë Kombëtare dhe Ndërkombëtare**

### **Festivali i Ushqimit dhe Pijeve “Mediterran”**

#### **Përshkrim shkurtimisht:**

Bashkia Korçë mori pjesë në Festivalin e Ushqimit dhe Pijeve “Mediterran”, organizuar nga Expocity Albania në bashkëpunim me Çelësi Media Group në Tiranë prej datës 12-15 Nëntor 2015. Ky aktivitet kishte për qëllim promovimin e produkteve, traditës, risitë dhe inovacionin në fushën e prodhimit e përpunimit agro- ushqimor si dhe gatimit në rajonin e Mesdheut. Në Festivalin e Ushqimit dhe Pijeve u përfaqësuan përgjatë katër ditëve, më të mirat e produkteve të ushqimit dhe pijeve, specialitetet e gastronomisë dhe kulinarisë, përfaqësues të zonave, bashkive apo komunave karakteristike që duan të shpalosin traditën e tyre, biznese nga të voglat deri te rajonalet dhe ata që tregtojnë ndërkombëtarisht.

Në festival merrnin pjesë Bashkia Tiranë, Elbasan, Berat, Komuna Zallher, Komuna Shëngjergj, si edhe një sërë biznesesh të njohura si vaji Olim, Mon Caffè, kafe Lavazza, Kantina e Pijeve “Skënderbeu”, fabrika e përpunimit të qumështit “Lufra”, Birra Peja, Uji Tepelena, etj. Festivali i Ushqimit dhe Pijeve “Mediterran” ishte një ndërthurje unike e ushqimit, pijeve, gatimit dhe teknikave të prodhimit dhe përpunimit të tyre, si nga prodhues industrial ashtu edhe nga ata artizanalë. Vende, zona e krahina paraqitën në këtë panair, traditat e tyre më të spikatura e origjinale në produkte dhe kulinari.

Gjatë katër ditëve në këtë festival, kishte mundësi të shihje më të mirën nga prodhimet lokale, rajonale dhe ndërkombëtare, furnizuesit e hotelierisë, prodhuesit e pijeve dhe prodhuesit e ushqimit. Ky festival ishte një mundësi, në kohën e duhur, për të promovuar produktet e veçanta, i cili shfaqti interes dhe pati një impakt pozitiv për të gjithë të ftuarit të cilët ishin informuar për ta vizituar. Festivali, gjithashtu u vizitua përgjatë katër ditëve, nga një numër i madh vizitorësh vendas dhe të huaj, të cilët shijuan produktet e veçanta, të ekspozuara në çdo stendë.

Vlera totale e projektit “Pjesëmarrje në Panairë Kombëtare dhe Ndërkombëtare”: **500 000 Lek.**

Vlera e realizuar e projektit: **83 817 Lek**



*Foto stenda e Bashkisë Korçë*

## **Panairi i Punës dhe Punësimi Sezonal**

### **Përshkrim shkurtimisht:**

Bashkia Korçë në kuadrin e programit "Qyteti mbështet të Rinjtë", në bashkëpunim me Universitetin "Fan S. Noli", Drejtorinë Rajonale të Formimit Profesional Publik Korçë, Drejtorinë Rajonale të Shërbimit Kombëtar të Punësimin (DRSHKP), Korçë organizuan në datën 29 Prill, ora 11:00 tek biblioteka "Thimi Mitko", Korçë Panairin e Punës 2015. Ky projekt synon të ofrojë mundësi punësimi për të gjithë të rinjtë që kanë përfunduar arsimin e lartë dhe të mesëm, në biznese lokale, banka dhe institucione të tjera, të cilat ofrojnë vende të lira pune me kohë të plotë ose të pjesshme. Përzgjedhja e kandidatëve për vendet e lira të punës, u realizua përmes intervistimit të të rinjve nga institucionet, që morën pjesë në këtë projekt.

Në fillim të muajit Gusht 2015, pas përzgjedhjes nga Panairi i Punës të studentëve që do të kryejnë praktikë profesionale në drejtoritë e ndryshme të Bashkisë Korçë, u realizua Punësimi Sezonal. Qëllimi i këtij projekti është angazhimi i studentëve në punë konkrete dhe vënia në praktikë e njohurive të fituara nga arsimimi i tyre. 44 studentët e përzgjedhur për të qenë pjesë e Punësimin Sezonal pranë Bashkisë Korçë, u vendosën sipas profilit të tyre të studimit në drejtori të ndryshme pranë Bashkisë Korçë dhe kryen praktikë për një periudhë një mujore në këto drejtori.

Vlera totale e projektit: **50 000 Lek**

Vlera e realizuar e projektit: **47 880 Lek**



*Foto nga Panairi i Punës 2015*

## Çanta suveniresh

### Përshkrim shkurtimisht:

Me qëllim nderimin e delegacioneve dhe personaliteteve të tjerë të rëndësishëm që vizitojnë qytetin e Korçës, Bashkia Korçë ka realizuar çantat e suvenireve, si një material promocional dhe përfaqësues, në të cilën vendosen të gjitha materialet e tjera promovuese të qytetit (guida, kalendar aktiviteteesh, hartë e qytetit, etj). Realizimi i një çante të tillë e stampuar me elemente simbolike të qytetit, përfaqëson një material promocional shtesë, krahas materialeve të tjera promovuese të realizuara gjatë vitit 2015.

Vlera totale e projektit: **50 000 Lek**

Vlera e realizuar e projektit: **45 000 Lek**



## Festa e 1 Qershorit

### Përshkrim shkurtimisht:

Bashkia Korçë, me rastin festës së fëmijëve organizoi edhe këtë vit një sërë aktiviteteesh social-kulturore. Festa e 1 Qershorit u realizua në ambientet e parkut “Rinia”, ku u zhvilluan një sërë aktiviteteesh si:

- Koncert festiv, organizuar nga Qendra Kulturore e Fëmijëve “Mihal Grameno”,
- Serenatistët e vegjël
- Kërcime nga grupet e aerobisë
- Fëmijet e ndryshëm të veshur si personazhe përallash
- Këndi i vizatimit
- Ekspozitë vizatimesh nga fëmijët e kopsheve dhe klasave fillore të qytetit



- Lojra të ndryshme të organizuara nga Fusion dhe Kenedi
- Lojra të ndryshme nga ekipi i të rinjve të karatesë
- Lojra të ndryshme nga ekipi i badmintonit

Të gjithë fëmijët e qytetit të shoqëruar nga prindërit festuan Festën e 1 Qershorit në atmosferën festive të krijuar enkas për ta.

Festa vazhdoi gjatë orëve të pasdites në Zonën Këmbësore të qytetit, ku u zhvilluan lojra të ndryshme për fëmijët nga Fondacioni Kenedi dhe grupe animatorësh, të shoqëruara me muzikë.

Vlera totale e këtij projekti e planifikuar nga Bashkia: **95 200 Lek.**

Vlera e realizuar e projektit: **95 200 Lek.**



## **Dita Ndërkombëtare e PAK**

### **Përshkrim shkurtimisht:**

Me rastin e 3 Dhjetorit “Ditës Ndërkombëtare të Personave me aftësi të kufizuar”, u realizua projekti “Dita Nderkombetare e PAK”, me tematikë “Festojmë së bashku”. Aktiviteti u zhvillua në ambientet e hotel “Grand” dhe salla ku u zhvillua aktiviteti u zbulua me tullumbace shumëngjyrëshe, duke e bërë më të ngrohte dhe festive ambientin. Përmes koncertit të organizuar nga Qendra Kulturore e Fëmijëve “Mihal Grameno”, u krijua një ambient tepër festiv, ku të gjithë personat me aftësi të kufizuar festuan së bashku. Në aktivitet morën pjesë rreth 100 persona nga institucione dhe OJF që kanë në fokus të punës së tyre aftësinë e kufizuar. Në fund të gjithë aktivitetëve të organizuara me sukses, u ofrua një koktej për personat e pranishëm.

Vlera totale e këtij projekti e planifikuar nga Bashkia **59 500 Lek.**

Vlera e realizuar e projektit: **59 500 Lek.**





## Dita e të Drejtave të Fëmijëve

### Përshkrim shkurtimisht:

Nëpërmjet projektit të 20 Nëntorit “Ditës së të Drejtave të Fëmijëve”, të gjithë fëmijët e shkollave 9-vjeçare të qytetit u njohën më mirë, me të drejtat dhe detyrat që ata kanë. Në qendër të qytetit u vendosën dy banera për Ditën e të Drejtave të Fëmijëve.

Përmes aktiviteteve të ndryshme sensibilizuese, u përcoll mesazhi për t’i thënë stop punës së të miturve. Gjithashtu në këtë ditë u realizua një ekspozitë nga shkollat 9-vjeçare të qytetit të Korçës, me të gjitha nenet e konventës për të drejtat e fëmijëve.

Fëmijët u argëtuan nëpërmjet aktiviteteve sportive, si edhe lojrave argëtuese të zhvilluara enkas për ta nga Fondacioni “Kenedi”.

Me rastin e kësaj dite u zhvillua një koncert i madh artistik me këngëtare të ndryshme, grupe vallesh dhe grupe animatoresh për fëmijë.

Vlera totale e këtij projekti e planifikuar nga Bashkia: **79 500 Lek.**

Vlera e realizuar e projektit: **79 500 Lek.**



## **Dita e Jetimëve**

### **Përshkrim shkurtimisht:**

Në kuadër të projektit të 20 Majit “Ditës Ndërkombëtare të Jetimeve” u organizuan një sërë aktivitete. Për realizimin e këtij aktiviteti, u dizajnuar dhe u realizua një baner, i cili u vendos në zonen këmbësore të qytetit dhe një baner tjetër në ambientet e lokal “Omega”.

Gjatë paradites së 20 Majit, në orën orën 11:00, Kryetari i Bashkisë i shoqëruar nga një pjesë e stafit të Bashkisë bëri një vizitë në shtepinë e foshnjës “Lulet e vogla”, ku bashkë me fëmijët e qendrës u kaluan disa orë duke u argëtuar së bashku në një kënd lojrash.

Me rastin e kësaj dite, Kryetari i bashkisë zhvilloi një takim me 250 fëmijët jetimë të shkollave 9-vjeçare dhe të mesme të qytetit të Korçës, në ambientet e bar “Omega”, ku u zhvillua edhe një koncert festiv nga fëmijet e qendrës kulturore të fëmijëve. Aktiviteti u përmbyll me një koktej për të gjithë të pranishmit.

Vlera totale e këtij projekti e planifikuar nga Bashkia: **150 500 Lek.**

Vlera e realizuar e projektit: **115 460 Lek.**